

Na osnovu čl. 4.2., 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 16. Pravilnika o licencama – Prečišćeni tekst ("Službeni glasnik BiH", broj 63/16), rješavajući po zahtjevu pravnog lica "Renewable Energy Solutions BH" d.o.o., Banja Luka od 2. augusta 2023. godine, koji je dopunjen 7. i 9. augusta 2023. godine, na sjednici Državne regulatorne komisije za električnu energiju, održanoj 13. septembra 2023. godine, donijeta je

ODLUKA

O IZDAVANJU PRIVREMENE LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM

1. Pravnom licu "Renewable Energy Solutions BH" d.o.o., Banja Luka, izdaje se privremena licenca za obavljanje djelatnosti međunarodne trgovine električnom energijom.
2. Privremena licenca iz tačke 1. ove Odluke izdaje se za period od 16. septembra 2023. godine do 15. septembra 2025. godine i koristi se u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom ("Službeni glasnik BiH", broj 14/16).
3. Privremena licenca za obavljanje djelatnosti međunarodne trgovine električnom energijom sastavni je dio ove Odluke.
4. Vlasnik privremene licence je u obavezi plaćati regulatornu naknadu u periodu važenja privremene licence, na način i u rokovima utvrđenim posebnim aktom.
5. Ova Odluka stupa na snagu danom donošenja, a njen dispozitiv bit će objavljen u "Službenom glasniku BiH" i službenim glasilima entiteta.

Obrazloženje

Pravno lice "Renewable Energy Solutions BH" d.o.o., Banja Luka (u daljnjem tekstu: podnosilac zahtjeva), posjeduje privremenu licencu za obavljanje djelatnosti međunarodne trgovine električnom energijom, koja je upisana u Registar licenci Državne regulatorne komisije za električnu energiju (DERK) pod registracijskim brojem 05-28-12-155-22/22 od 15. septembra 2022. godine, koja istječe 15. septembra 2023. godine.

Shodno pravu da koristi mogućnost obnove licence, podnosilac zahtjeva je izrazio svoju namjeru da djelatnost međunarodne trgovine električnom energijom nastavi i dalje obavljati, te je zahtjev za izdavanje nove licence, zaprimljen pod brojem 05-28-12-254-1/23, podnio 2. augusta 2023. godine. O podnijetom zahtjevu odlučuje se u skladu s pravilima i propisima DERK-a i shodno članu 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11).

Zahtjev je podniet na propisanim obrascima, s dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnieti uz zahtjev ili naknadno, omogućili DERK-u da razumije, razmatra i odlučuje o podnijetom zahtjevu, o čemu je obavijestio podnosioca zahtjeva svojim aktom broj 05-28-12-254-6/23 od 10. augusta 2023. godine.

Po pregledu i provjeri svih formalnih elemenata zahtjeva, DERK je 14. augusta 2023. godine objavio u dnevnim novinama i na svojoj internet stranici kratku obavijest za javnost sumirajući zahtjev za izdavanje licence i odredio rok do 22. augusta 2023. godine za dostavljanje komentara javnosti na podnieti zahtjev.

DERK je konstatirao da nisu dostavljeni komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

DERK je izvršio provjeru podataka, dokumenata i informacija priloženih uz zahtjev i utvrdio da isti svjedoče o tehničkim, pravnim i finansijskim mogućnostima podnosioca zahtjeva da ispuni sve kriterije, uvjete i standarde propisane zakonom, pravilima i propisima DERK-a za dodjelu licence za obavljanje djelatnosti međunarodne trgovine električnom energijom.

Stoga je pripremljen Nacrt odluke o izdavanju privremene licence, koja se koristi u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom. Ovaj dokument je od 31. augusta 2023. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi obavljenoj 6. septembra 2023. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Imajući u vidu da je ovlašten predstavnik podnosioca zahtjeva, u skladu s članom 16. stav 2. Pravilnika o licencama – Prečišćeni tekst, dao izjavu kojom se, u cilju ekonomičnosti postupka, podnosilac zahtjeva odriče prava na dostavljanje komentara na Prijedlog odluke, bilo je osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operatoru sistema električne enegije u BiH i podzakonskim propisima koji reguliraju predmetnu materiju.

S namjerom osiguravanja kontinuiteta posjedovanja licence za obavljanje djelatnosti međunarodne trgovine električnom energijom, a imajući u vidu da ranije izdata privremena licenca istječe 15. septembra 2023. godine, DERK, u odnosu na Nacrt odluke, podnosiocu zahtjeva izdaje privremenu licencu počev od 16. septembra 2023. godine, u trajanju od dvije godine.

Na osnovu svega naprijed navedenog, te respektirajući i činjenicu da je podnosiocu zahtjeva 28. juna 2023. godine izdata dozvola Regulatorne komisije za energetiku Republike Srpske, s rokom važenja od tri godine, DERK je odlučio kao u dispozitivu ove Odluke.

U skladu s članom 9.2. Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-254-20/23
13. septembra 2023. godine
Tuzla

Predsjedavajući Komisije
Nikola Pejić